

CONVENIO DE COLABORACIÓN ENTRE A CONSELLERÍA DE PRESIDENCIA, XUSTIZA E DEPORTES O COLEXIO OFICIAL DE PSICOLOXÍA DE GALICIA EN MATERIA DE PROTECCIÓN CIVIL, PARA DAR UNHA RESPOSTA PSICOLÓXICA EN EMERXENCIAS E CATÁSTROFES

REUNIDOS

Dunha banda, Diego Calvo Pouso, conselleiro de Presidencia, Xustiza e Deportes, que en virtude do seu nomeamento por Decreto 44/2024, do 14 de abril, actúa de conformidade coas facultades que lle atribúe o artigo 34 da Lei 1/1983, do 22 de febreiro, de normas reguladoras da Xunta e da súa presidencia, así como o Decreto 136/2024, do 20 de maio, (DOG núm. 101, do 27 de maio), polo que se fixa a estrutura orgánica da Consellería de Presidencia, Xustiza e Deportes.

Doutra Dna. M^a Rosa Álvarez Prada, decana do Colexio Oficial de Psicoloxía de Galicia, en nome e representación de este segundo o establecido no artigo 31.1.A dos seus estatutos.

EXPOÑEN

O Decreto 136/2024, do 20 de maio, polo que se fixa a estrutura orgánica da Consellería de Presidencia, Xustiza e Deportes, establece que esta consellería, a través da Dirección Xeral de Emerxencias e Interior, é o departamento encargado de xestionar as competencias atribuídas á Comunidade Autónoma de Galicia, en materia de protección civil, en virtude do establecido no Decreto 42/2024, do 14 de abril polo que se establece a estrutura orgánica da Xunta de Galicia (DOG número 73 do 14 de abril) e no Decreto 49/2024, do 22 de abril (DOG número 81, de 24 de abril) polo que se fixa a estrutura orgánica das consellerías da Xunta de Galicia.

O artigo 24 do Decreto 56/2000, do 3 de marzo, polo que se regula a planificación, as medidas de coordinación e actuación de voluntarios, agrupacións de voluntarios e entidades colaboradoras en materia de protección civil de Galicia (DOG nº 62, do 29 de marzo de 2000), modificado polo Decreto 109/2004, do 27 de maio (DOG nº 108, do 7 de xuño de 2004), estipula que a Xunta de Galicia poderá asinar convenios de colaboración con entidades públicas e privadas.

Que conforme ao establecido nos artigos 5.3 e 47.2 da Lei 5/2007 de emerxencias de Galicia, a Xunta de Galicia poderá subscribir convenios de colaboración con entidades públicas ou privadas co fin de facilitar a colaboración das mesmas na xestión de riscos e de emerxencias.

O artigo 49 do Decreto 56/2000, do 3 de marzo, que regula a planificación, as medidas de coordinación e a actuación de voluntarios, agrupacións de voluntarios e entidades colaboradoras en materia de protección civil de Galicia, establece como fin principal a



colaboración coas autoridades competentes na realización de tarefas relacionadas coa protección civil.

O Colexio Oficial de Psicoloxía de Galicia ostenta a representación da profesión de psicólogos na Comunidade Autónoma de Galicia, tendo entre os seus fins a promoción e desenvolvemento técnico e científico da Psicoloxía e o servizo dos seus profesionais á sociedade.

A Xunta de Goberno, órgano executivo do Colexio Oficial de Psicoloxía de Galicia, tén, entre as súas competencias, a de poder constituír grupos de traballo ou estudo, designar aos colexiados/as que estime oportuno para a presentación de estudos, informes e ditames, por requirimento ou a iniciativa propia, co fin de asesorar á administración, como se contempla nas súas funcións de colaboración coa Xunta de Galicia.

O servizo de protección civil é un servizo esencial e de carácter excepcional na nosa comunidade xa que funciona as 24 horas do día os 365 días do ano. Ao ser imposible planificar todas as actuacións nas emerxencias, xa que ocorren a calquera hora e día do ano, estas non se poderían afrontar coa mesma garantía se non se tiveran en conta todos os medios existentes, especialmente aqueles de carácter específico e especializado.

Entre os medios e recursos mobilizables pola Consellería de Presidencia, Xustiza e Deportes, é conveniente contar en determinados momentos, ademais dos propios, con medios alleos co fin de optimizar recursos e orzamentos, sendo obxecto deste convenio a colaboración co Colexio Oficial de Psicoloxía de Galicia en materia de protección civil, entendendo esta como a seguridade dos cidadáns e os seus bens, a través do seu coñecemento, poñendo en valor o interese da prevención e socorro, así como a práctica individual e colectiva da autoprotección, como medidas primordiais para evitar riscos o cando menos minorar as consecuencias dos posibles accidentes.

O Colexio Oficial de Psicoloxía de Galicia ven sostendo un grupo de traballo, Grupo de Intervención Psicolóxica en Catástrofes e Emerxencias "GIPCE", organizado en forma de rede para activar, e dotado coa necesaria capacitación técnica e estrutura organizativa, adquirida ao longo destes anos de colaboración coas autoridades de protección civil da nosa comunidade nos que se acadaron bos resultados, permitíndonos dispoñer dun recurso necesario para dar unha resposta psicolóxica en desastres de media e gran magnitude.

Dado que estas funcións só poden ser exercidas de forma exclusiva na nosa comunidade autónoma polo Colexio Oficial de Psicoloxía de Galicia, non é posible a aplicación dos principios de publicidade e concorrencia pública, de acordo co establecido na Lei 1/2016 do 18 de xaneiro de transparencia e bo goberno, na administración pública galega.

Por isto ámbalas dúas partes,



ACORDAN

Primeiro. Obxecto do convenio

O obxecto do presente convenio é establecer as bases para a colaboración entre a Consellería de Presidencia, Xustiza e Deportes, a través da Dirección Xeral de Emerxencias e Interior, e o Colexio Oficial de Psicoloxía de Galicia, en canto ao apoio que este poida aportar á acción permanente dos órganos e autoridades competentes en protección civil para a prevención e intervención ante as emerxencias.

Segundo. Obxectivos específicos

A colaboración centrarase nos seguintes apartados:

- Atención ás emerxencias ordinarias especiais nas que, unha vez avaliadas polos técnicos de protección civil e os técnicos do GIPCE, decidirán en consecuencia a súa actuación, podendo desprazarse ao lugar onde se producira a emerxencia, para a atención psicolóxica ás vítimas e familiares
- Formar parte dos comités asesores dos diferentes plans de protección civil elaborados pola Xunta de Galicia.
- Participar nos equipos de implantación dos plans de protección civil que poidan orixinar graves accidentes con importantes repercusións nas persoas e no medio ambiente.
- Formar parte do gabinete de información dos plans de protección civil, en todo o relacionado coa difusión de información á poboación que o precise, cando se produza unha catástrofe ou unha gran emerxencia .
- Colaborar cos grupos de traballo e co persoal técnico da Dirección Xeral de Emerxencias e Interior na organización e programación de:
 - Simulacros organizados pola dirección xeral, nos que participarán as agrupacións de persoal voluntario de protección civil e as entidades colaboradoras.
 - Xornadas programadas coas asociacións provinciais de agrupacións e asociacións de persoal voluntario de protección civil.
- Cooperar e participar en accións formativas dirixidas a persoal técnico e colaborador de protección civil de Galicia.
- Intervir noutras comunidades en situacións que, debido a súa magnitude, desborde a súa capacidade de resposta. Para actuar nestes casos terá que existir unha solicitude de intervención previa do GIPCE ao Colexio Oficial de Psicoloxía e que esta sexa aceptada tanto dende a Dirección Xeral de Emerxencias e Interior como dende o propio grupo.

Terceiro. Mobilización e identificación do GIPCE

Nos supostos de emerxencias ou activación de plans de protección civil ou cando o requiran as autoridades de protección civil da Xunta de Galicia, a mobilización dos recursos dos integrantes do GIPCE realizaranse a través do Centro de Atención de Emerxencias 112-Galicia.



Para o cumprimento das devanditas actividades a Dirección Xeral de Emerxencias e Interior, ademais da asistencia financeira que se estipula máis adiante, executará as accións oportunas para que o GIPCE, creado e sostido polo Colexio Oficial de Psicoloxía de Galicia, dispoña de identificación autorizada e apropiada, así como, o logo da central de emerxencias 112 na súa uniformidade, para as labores a desenvolver.

Cuarto. Libramiento de fondos

A Consellería de Presidencia, Xustiza e Deportes, a través da Dirección Xeral de Emerxencias e Interior, colaborará para financiar os custos que xeren as actividades realizadas para que se cumpran os obxectivos do presente convenio, reflectido no orzamento global de previsión de gastos (anexo I), cunha achega por un importe máximo de setenta mil euros (70.000 €), con cargo á aplicación orzamentaria 05.06.212A.640.0 e código de proxecto 2015 00138 dos orzamentos do ano 2025.

Para percibir a cantidade que achega a Dirección Xeral de Emerxencias e Interior, o Colexio Oficial de Psicoloxía de Galicia presentará os seguintes documentos:

- A conta xustificativa dos gastos totais realizados e a documentación acreditativa do seu pago (nóminas, facturas, etc), tendo en conta que a cantidade máxima que se obriga a aportar a Consellería de Presidencia, Xustiza e Deportes é de setenta mil euros (70.000 €), reducíndose na mesma proporción ás cantidade xustificadas respecto do orzamento total (anexo I).
- Facturas e xustificantes de pagamento correspondentes aos gastos totais realizados. Consideraranse xustificantes de pagamento válidos unicamente os extractos ou certificacións bancarias debidamente identificados, selados e asinados pola decana do colexio.
- Para aquelas compras realizadas en metálico, inferior a 1.000 € por factura, será suficiente a factura orixinal ou compulsada polas oficinas de rexistro en que figure "pagado" xunto coa sinatura e o número de NIF da persoa encargada da empresa subministradora.
- Documentos de liquidación de gastos de mantemento, desprazamento e loxística, polo cumprimento das actividades do convenio, na que figure tanto a conformidade da decana do colexio como o "recibín" do perceptor desta compensación.

No caso de non presentarse as facturas suficientes no prazo establecidos ou ben non ser correctas na súa totalidade, o libramiento dos fondos verase reducido na mesma proporción que represente a cantidade xustificada respecto do orzamento total.

A Dirección Xeral de Emerxencias e Interior acompañará unha certificación na que se indique o cumprimento, por parte do Colexio Oficial de Psicoloxía de Galicia, das obrigas contidas neste convenio.

Ao abeiro deste convenio poderán financiarse os gastos nos que tivese incorrido a entidade



como consecuencia da realización de actuacións acordes co seu obxecto, incluso aqueles que se efectuasen con anterioridade á sinatura deste, sempre que se trate de gastos correspondentes ao actual exercicio económico.

Toda a documentación xustificativa descrita nesta cláusula deberá estar en poder da Dirección Xeral de Emerxencias e Interior, a máis tardar, o 30 de novembro de 2025.

Quinto. Publicidade

En concordancia cos artigos 14 e seguintes da Lei 19/2013, do 9 de decembro, de transparencia, acceso á información pública e bo goberno, as partes asinantes deste convenio outorgan o seu consentimento para que os datos persoais e o resto das especificacións que constan no citado convenio sexan publicados no Portal de Transparencia e Goberno Aberto e no Rexistro de Convenios da Xunta de Galicia, de acordo co establecido no artigo 15 da Lei 1/2016, do 18 de xaneiro, de transparencia e bo goberno, no Decreto 126/2006, do 20 de xullo, polo que se regula o Rexistro de Convenios da Xunta de Galicia

Sexto. Comisión de seguimento

Créase unha comisión mixta, constituída por dous representantes por cada unha das partes, que velará polo cumprimento das estipulacións deste convenio e proporcionará o soporte de xestión axeitado para atender os supostos que as circunstancias puideran deparar e propoñer as actuacións que sexan necesarias para o desenvolvemento e execución do mesmo.

Pola Dirección Xeral de Emerxencias e Interior:

- A persoa responsable dunha subdirección xeral da Dirección Xeral de Emerxencias e Interior

Un/unha técnico/a dependente da mesma

Polo Colexio Oficial de Psicoloxía de Galicia:

- A decana do Colexio e a coordinadora do GIPCE

Sétimo. Modificación do convenio.

O presente convenio poderá ser modificado por mutuo acordo a través da subscripción da correspondente addenda modificativa, que deberá ser subscribida polas mesmas partes que asinan este convenio.

Oitavo. Inscripción como Entidade Colaboradora do Rexistro de Protección Civil.

O artigo 61.2C) do Decreto 56/2000, do 3 de marzo, polo que se regula a planificación, as medidas de coordinación e actuación de voluntarios, agrupacións de voluntarios e entidades colaboradoras en materia de protección civil de Galicia, determina o procedemento de inscrición na sección de Entidades Colaboradoras do Rexistro de Protección Civil. Entre as condicións que se establecen para que as Entidades Colaboradoras de Protección Civil poidan inscribirse no citado Rexistro, inclúese a copia do convenio suscrito entre a entidade e o



órgano competente en materia de protección civil da Xunta de Galicia, polo que a sinatura do presente convenio será condición necesaria para a inscrición do Colexio Oficial de Psicoloxía de Galicia na sección de Entidades Colaboradoras de Protección Civil.

Décimo. Causas de resolución

O presente convenio resolverase:

- a) Por incumprimento total ou parcial dalgunha das estipulacións que o regulan.
- b) Polo transcurso do tempo estipulado sen que se culminen as actividades acordadas.

De se resolver o convenio, a Consellería de Presidencia, Xustiza e Deportes poderá, de ser o caso, esixir o reintegro das cantidades achegadas.

Noveno. Lexislación aplicable

As dúbidas que se presenten na súa interpretación, caso de discrepancias, serán resoltas, visto o informe da comisión de seguimento, polo conselleiro de Presidencia, Xustiza e Deportes, poñendo así fin á vía administrativa.

O incumprimento de calquera das cláusulas do presente convenio constituirá causa suficiente de rescisión do mesmo, dando lugar á súa resolución e, no seu caso, á devolución das cantidades percibidas, xunto cos xuros de demora correspondentes si fora o caso.

O presente convenio ten carácter administrativo, quedando ámbalas dúas partes suxeitas á xurisdición contencioso-administrativa para a resolución de calquera conflito que puidese xurdir como consecuencia do mesmo e ao disposto pola Lei 40/2015, do 1 de outubro, do Réxime Xurídico do Sector Público e polo Acordo da Xunta de Galicia, do 27 de marzo de 1991, sobre convenios de cooperación con outros entes públicos e de colaboración con particulares, feito público por Resolución da Consellería de Economía e Facenda, do 8 de abril de 1991.

Décimo primeiro. Relación entre as partes

A sinatura do presente convenio non supón relación laboral, contractual ou de calquera tipo entre os profesionais que vaian desenvolver as actividades e a entidade que o asina, de tal xeito que non se lle pode esixir responsabilidade ningunha directa nin subsidiaria polos actos ou feitos acontecidos no desenvolvemento do mesmo

Aínda que é un dos excluídos do ámbito de aplicación da lei 9/2017, do 8 de novembro, de contratos do Sector Público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, segundo especifica o seu artigo 4, ao non previsto aplicaráselle os principios recollidos no citado texto, co fin de resolver dúbidas e omisións que puidesen presentarse. Así mesmo, de maneira supletoria terase en conta o Decreto legislativo 1/1999, do 7 de



outubro, pola que se aproba o texto refundido da Lei de réxime financeiro e orzamentario de Galicia e demais normativa vixente na materia.

Décimo segundo. Tratamento de datos de carácter persoal

As partes asinantes virán obrigadas en materia de protección de datos a cumprir co Regulamento (UE) 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/46/CE (Regulamento xeral de protección de datos), e coa Lei Orgánica 3/2018, do 5 de decembro, de Protección de Datos Persoais e Garantía dos Dereitos Dixitais e coas demais disposicións vixentes sobre a materia.

Décimo terceiro. Vixencia

A data de efectos do presente convenio será dende o momento da súa sinatura ata o 31 de decembro de 2025.

Antes da finalización do prazo de vixencia, os asinantes poderán acordar unanimemente a súa prórroga por un máximo dun ano máis. De prorrogarse o convenio, na correspondente addenda estableceríanse as obrigas concretas das partes asinantes.

Santiago de Compostela

Pola Xunta de Galicia
O conselleiro de Presidencia, Xustiza e Deportes

Diego Calvo Pouso

Polo Colexio Oficial de Psicoloxía de
Galicia,
A decana

M^a Rosa Álvarez Prada



ANEXO I

ORZAMENTO GLOBAL ESTIMADO DE PREVISIÓN DE GASTOS

Colexio Oficial de Psicoloxía de Galicia

Grupo de Intervención Psicolóxica en Catástrofes e Emerxencias (GIPCE)

1. Actividades de formación	5.500 €
2. Reunións e desprazamentos	7.000 €
3. Coordinación	32.000 €
4. Actuacións técnicas	12.000 €
5. Gastos administrativos, funxibles, telefonía, etc.	6.000 €
6. Gastos imprevistos	4.000 €
7. Seguro	3.500 €
TOTAL:	70.000 €

